

四庫全書

集部

欽定四庫全書

集部

燭湖集卷十三

詳校官庶吉士臣吳烜

主事臣呂雲棟覆勘

謄錄副貢生臣杭光晉

欽定四庫全書

燭湖集卷十三

宋 孫應時 撰

祭文

祭晦翁朱先生文

嗚呼先生名在天壤道在方策其試也嘗剖符握節而  
大庇其民其遇也得持橐執經而獻忠於上紛世議之  
排擯幸家居之樂康懸車引年曳杖安死今則已矣人  
其謂何某猶冀及門庶幾卒業永負此恨曷敢他論嗚

呼去夏之枉書杪春而拜賜筆言游之祠事標吳地之軼聞託名其間為惠不朽若乃丹陽之改爵實載定陵之長編竊訂所疑敢因以告窮途承訃菲奠寓哀惟有精神不間生死

祭象山陸先生文

嗚呼先生之姿英亮卓越先生之志奮迅堅決先生之學簡易昭晰先生之論敷暢條達先生用心貞實惻怛先生教人感動激切先生德行平正高潔先生文章嚴

健超絕嗚呼斯所謂名世之才振古之傑信乎天實付  
之以斯道之重宜若開之以格君之烈名鼎成於天下  
進益孚於朝列一造膝以極論喟皇心其有發騫將行  
兮或尼閣不見兮采葛優游兮山林詠歌兮風月獨私  
淑兮其徒蛻塵埃兮玉雪出緒餘兮一邦楚之人兮大  
悅忽巷哭以過喪竟何爲乎造物嗚呼哀哉昔道統之  
承承百聖儼其合節昉洙泗之無師已參差而異說矧  
千載之墜緒親左提而右挈膏衆車而並駕羌實難兮

一轍廼先生之仁勇無力爭於毫髮般紛紛其奚怪淺  
或疑於相軋加數年其可冀會皇極以昭揚愴此事之  
今已渺方來而孰察憶趨隅於逆旅心專專兮蘊結踊  
申旦而不寐實冥蒙之一豁曰深恨其自茲戒斧斤之  
斬伐邈東西以有年眈微衷兮如渴日行役以過楚期  
欲往而道輟曾報書之幾何痛終天之永訣寫此哀其  
已晚望眼眩而心折尚不辱於師門儻歆誠兮一歡

祭石南康文

嗚呼論斯文之興衰推世道之升降非晚進小子所敢知也至於師友凋落使遐鄉後學無考德問業之地賢德消盡使當世君子懷孤立寡助之戚頻年之間千里交訃則雖如某之愚苟一念之猶不自知其痛心雨淚而不能已也嗚呼有如先生之喪其尚忍言哉先生體道之微講學之至未易窺測抑嘗竊識之氣貌溫恭而辭旨清厲襟懷夷曠而權度詳密平居柔忍而臨事敢斷自奉簡薄而遇人委曲此古所謂成德之士非耶先

生居鄉恂恂與物亡忤雖所親故知我何如人也起而登朝造膝極論忠犯顏色風猷聳然當是時天子有意納用而先生深惟一時出處之故誼有不得留者謁告將母從容東歸有志之士引領稱歎自恨弗及而先生之勇聞於天下矣自頃諸公言論風旨稍見於世讒忌輒起訕笑交集而先生安然就義歸然徇道獨未有非之者此其規模氣象真任重道遠之事天下之所望於先生者可勝計哉嗚呼先生齒髮未衰名德方昭其曾



中自強之念又未始息也南康之麾未行而以喪罷喪未終而身從之天乎天乎尚何言哉某來官黃巖始拜先生於台每捧檄上下城府未嘗不得見焉先生愛之而憂其學之急而荒也乃五月之晦面會某曰子朝夕而去官過郡其館於我吾將與熟論斯事而後別焉某謝曰此固小子所願請者也孰謂言未終月而以訃至使某抱無涯之恨而不獲竟先生之德耶嗚呼先生其死矣我無所復望矣繼自今誦六經之言述師友之訓

卷十三  
惕焉夙夜求寡乎愧忤以不爲親之憂儻庶幾乎先生  
愛我之心耶嗚呼哀哉

祭張叅政文

嗚呼士感知已或輕一死公之知我又非他比同州異  
縣輩行懸隔竊慕公賢邈未一識我宰琴川公使過吳  
采之道路歸騰薦書我初不聞久乃謝公報我玉字音  
問始通我坐拙踈不爲身謀受代辭行掇怒郡侯公居  
法從力救不可羅織炎炎危於死禍從容廟堂辨以仁

言易審他郡迄遂平反人非雅故難於相知既負大謗  
難於不疑昭我素心全我終身望我國士別我衆人我  
不自意何以得此胡能有報期於沒齒公還自西一拜  
儀刑契闊三年莫同死生維公盛德不可悉數如何昊  
天喪此賢輔事關國家我不敢知寫哀以辭則維我私  
祭呂子約寺丞文

嗚呼子約竟以謫死豈非命也命乃在天其尚何言嗚  
呼人均一死長短孰計若吾子約不欺其君不辱其先

不媿其心死而死耳其又何悲平時友生官守隔絕犇  
問不時我則有負緘辭千里筆與淚俱嗚呼子約尚克  
知之

祭史太師文

嗚呼仕莫顯乎宰相學莫尊於帝師福莫大乎長久壽  
莫隆乎耄期紛人生之多欲視眈眈焉朶頤聽予奪於  
司命孰千一其庶幾偉冲氣之生公振天壤而登茲早  
奮庸於隆興復圖任分淳熙帝曰台之甘盤眷有加而

無衰循孤棘以遍歷極上公之盛儀懿綠野之歸老時  
安車兮來思馳玉府之好賜使冠蓋其相追積貴寵於  
三紀榮名流乎四夷森謝庭之芝蘭間却桂之相輝頷  
晨寢之問安印綬續其陸離炯精神之照人齒編貝兮  
厖眉奏歌舞兮申旦方左書而右詩閱春秋之九十乃  
蟬蛻而騎箕嗚呼盛哉此豈惟近世之所未見蓋自古  
大臣故老終始之際求如公者幾希豈天命之偶然功  
與德焉當之公之功德有問答之所不能究嘗試言其

大者固足以曉天下之疑當重華之初潛公朝夕而進  
規及內禪之定計靡纖微而不咨妙調護於無形成兩  
宮之孝慈迄盛事之光明軼宇宙分一時皇指心而嘉  
勞曰功德之在斯嗚呼夫使高宗倦勤二十六年之久  
而無一日之不樂則天地國家之報公者至此而誰曰  
不宜至於仁民愛物之惻惻推賢薦士之孜孜消物我  
與恩怨篤親故而不遺量海納以無滿謙卑逾以布衣  
彼平心以深考亦何公之敢訾藐不肖之賤窮晚見公

於既歸雖辱盼以國士匪懷恩於已私役萬里以過返  
來哭公之殯惟感君臣之際會覽今昔以悽悲盡斯言  
之不忍內激烈於肝脾羞鷄酒以一酹諒英靈兮我知

祭魏子明先生文

我昔從公癡未成童弄翰學語不知西東規矩一年能  
使人巧稍就分寸惟先生教喟言報德心重力微胡逝  
莫留終天有違有行有文奈何乎命千古同歸孰負孰  
勝几筵在堂魂兮何方尚相厥子公猶不亡

祭宋秉彝文

某始來此邦訪求善士聞君典刑一邑之偉昔在東萊  
實器重君白髮讀書富貴如雲我思老成其室則遠幸  
君疾瘳迎門未晚嗟嗟蒼天曾不憖遺喬木其摧故國  
之悲易簣有言念我良厚惠我以規我其可負幽明永  
間無間者心薦此忱辭君兮孔歆

祭諸葛誠之文

余游太學始交誠之不量我愚以遠見期余陋無聞誠



之是咨余弱未奮誠之是儀博我以友正我以師有端  
有原誠之之爲同州異縣一合一離義重金石情通墳  
簾我嘗苦貧志撓節早有腴夾塾謂余來思匪兄我寤  
我悔曷追是有大造刻銘肝脾樵風若耶兄耕其湄明  
月扁舟詠歌相隨我官委吏兄擢禮闈慶兄有成世道  
可裨壬寅我還憐我猶癡武林譙讓敬受敢辭我適海  
陵過君浙西酌我父兄送我依依君喪玉昆我哭以詩  
我罹大難君尤我悲舟途差參相踵東歸訪我不果書

來獻歎是維中夏我病不支報書訴哀恐無見時云胡  
旬日君乃疾危六月中澣竟不可醫嗟嗟誠之曷其止  
斯天不可號理不可推寢門大慟撫棺莫施我則免喪  
君死再暮嗚呼哀哉講學之難又各自知喟我同儕成  
德其誰十五六年耿耿昨非惟其弗措終或庶幾達材  
之厚天既奪之誠之之強又摧折之死者已矣生者何  
居神理不昧尚克相茲誠之學行墓碣可稽我復何言  
獨感我私升堂拜母問其孤嫠魂兮何方歆我一卮

祭胡達材文

嗚呼達材而止斯邪天實止之謂之誰邪當今四方儒  
先凋零曷云其依殘月明星爰及吾徒爰起爰繼朋游  
之私矐焉胥勵薄厚粹駁銳鈍不齊聚散萍蓬南北東  
西悠悠十年一屈伸肘誰其卓然以慰師友維吾達材  
靜篤純明器閎以方心和且平自其家傳令德孝恭既  
繹既研洞闢昭融爰祛其疵爰達其順我亦闕之無疆  
之進日咸於家日孚於鄉曰余不知和同敦龐篋庫之

勞意亦自試從容猥瑣克敬厥事世變相重士危弗容  
匪忌以姍則疑以攻兄伏下寮見者革心曰毋敢訾粹  
玉渾金國有老臣能以兄薦以退蒙進漢焉非願嗚呼  
達材大受之資不寧吾徒衆人所期弗弔昊天降割斯  
文頻年屢驚我心如焚往者之哀來者之待重厚魁梧  
曰維兄在嗟我不見三歲於今方當就兄余誨余箴如  
何昊天曾是不遺大雪繁霜何草不萎嗚呼達材今也  
則死始望之殷伊其永已矧兄嗣事先德再輝門戶攸

慶族姻具依有疾其昆載扶載安叔季孔偕以問以觀  
今我之來內外哀慟入門慙恍如癡如夢言有終盡我  
痛靡窮呬呼蒼蒼混茫鴻濛酹此一卮兄其我知永訣  
終天魂兮來思

祭胡崇禮提幹文

嗚呼人固有一死死而無所可憾然後為天地之常理  
嗟吾崇禮官於異鄉而罹於瘡癘年不五十病不五日  
奄無言而長寐已而禍其令妻與其季女以及其嫠妣

恍一月而四喪猶不數乎媼婢方並室之呻呼惜莫能  
以相視哭聲震而迭驚目就瞑而餘淚幽冥莽其難測  
豈攜持而偕逝泛吳淞以度浙宛靈車之畢至總帷綰  
其並設日號踊乎幼稚所知盡而拊心行道愍而垂涕  
嗚呼悲夫痛哉死之可憾一至於此而亦孰謂吾崇禮  
之至此也聖人有言善人吾不見之見有恒者可矣自  
晚周猶有此歎而何況乎今之士噫世道之日異機變  
囂其一軌若崇禮者其幾於善人且有恒者歟何其天

典之厚而天資之懿觀夫於其先世於其祖禰於其短折之昆弟莫不致愛於其生存而致隆於其喪紀莫不盡力於其墓宇而盡誠於其時祀莫不務實於其手澤而務揚於其德美由是而推之則又仁其宗族仁其姻婭仁其故舊仁其閭里身垢衣而惡食魯寒餒之弗計犯風露以宵征率皇皇於赴義酷投分於師友雖骨肉而奚啻紛譏笑之滿前終此心之不二嗚呼斯人之未易見也而何其若是而止也又豈可謂福善禍淫各因

其類者乎矧伉儷之淑惠穆人神其無悔併一網之不  
貸呼彼蒼矣何罪孽笄女之及時今孰期而結悅兩兒  
秀而不凡忍莫爲之怙恃賴手足之犇救躬綜理於終  
事卜翁湖之南麓尚平生之素志諒善慶之復興將有  
觀乎厥嗣喟余家之世舊託心交兮臭味君於我而愈  
親真異體而同氣日春莫之過吳兄出延而倒屣指明  
年之相依方委余以其子魯慘別之幾何痛一朝之永  
已泪淋浪而雨集神愁傷而自沮瞻宇宙之無窮獨人



生其何脆念匍匐於初訃耿窮居而莫遂信良朋之永  
嘆異急難於常棣茲拊棺而大慟言莫舒於余媿魂何  
之兮歸來歆此卮之一酌

祭興元吳侯文

惟公早以世功特膺睿獎入司禁旅出護邊屯兼鎮七  
州獨當一面軍民服其恩信中外憚其威名爰寵畀於  
節旄遂超陞於槐棘若夫安邊之精慮奉上之小心約  
已以足兵愛人而好士求諸古昔難可擬倫是宜上而

漢公卿之廟謀下而蜀父兄之輿論皆視公身之安否  
以爲西鄙之重輕嗟乎二十年豫備之規模數千里習  
聞之號令政精神之未艾期勲業之大成胡一疾之弗  
支雖百身而奚贖某屬茲分閫託在同盟方陳腹心之  
言共訂本根之計曾未乾於報墨忽已奉於訃音哽涕  
泗之無從炯英靈之如在敬馳菲奠庸寓一哀

祭同班樓大聲文

嗚呼物之久弊理或可徵方華而萎使人震驚與余同

班適造帝廷君立第三風姿玉冰陞楯相語識君姓名  
壽母在都文昌維兄此又通籍一門孔榮想君歸拜笑  
語盈盈招提萃止申我交情七箸纖悉條畫精明倚辦  
於君四座蒙成匪惟其才實惟其誠即此一斑見君平  
生措諸事業井井繩繩小閣不見體微不寧如何不淑  
一寐弗興嗚呼丁未丁丑僅三閱旬慶者未已哭者在  
門東海洋洋逝川汙汙君乎何之忍違其親銘旌出舍  
行道酸辛一奠永訣君聞不聞

祭沈元授主簿文

嗚呼禍淫福善天實宜之回夭跖壽竟孰尸之鴻濛幽  
紛吹萬不齊使我烝民爲歡爲悲嗟嗟元授生也百罹  
孤孽一身凜然自持其未有家風雨塗泥既勤既營賓  
祭孔時實孝實敬實直不欺實義實廉實篤不疵鄉有  
偉士學者有師以若所負莫量厥施嗟嗟元授命則爾  
違半生橋門往來栖跼踰一官不及療饑五十有三  
何數之奇寡妻稚子有女未笄門戶單筮孰撐孰支嗚

呼哀哉自我識君十六七年我友我昆我嫻我連好我  
知我期我以賢其羣僂僂其別悄悄憂君之病幸君之  
痊亦既見止喜悅翩躚曾是不遐而隔終天人門拊柩  
淚下迸泉自古有死今亦何言歆我一觴鑒我惓惓

祭表姪莫幼明秀才文

嗚呼事有不容於前知數有不可以預期德或爽而為  
憾喜或終之以悲人生孰無一死若汝之死則吾實莫  
知其所爲吾之族親固少其業儒者尤少業儒而可共

學者又加少自我先君蓋嘗歎息於斯而惟乃父我之  
自出視我先君亦步亦馳暨汝伯氏亦克自立惟吾兄  
弟是依汝昔稚齒而我宦游及歸自蜀見汝始冠而甚  
愛其天資我之在鄉汝不我離我宰琴川復以汝隨汝  
疾而歸我送以詩我已未之滿戍忽官謫之百罹繫窮  
途而相望汝隱憂而涕洟幸再歲之來還汝疾平而尚  
羸吾嘗疑汝骨清寒而難壽猶默謂汝眼端秀而一奇  
效我書而酷肖聽我言而善思澹外物以無好儼暗室

而不欺蓋其生也二十八年未嘗有子弟之過若金玉之無疵嗚呼吾是以嘗欲扶持以成就汝汝何忍捨我而遽死也捨我猶可何忍捨而母而兄而遽死也吾邑前大夫常侯世爲名家身爲名人汝惟幼賤寒族異鄉欲交何由去年之春侯初訪我爲子求師吾未有以對也而汝來自外適在吾傍吾愕且喜即以汝授侯自是每得侯書未嘗不稱賞汝傳聞一邑遂皆知汝之爲善士當是時而母而兄以德以喜蓋可知矣然汝仲氏代

汝舊館曾不兩月忽天非命則因我舉汝而使汝家不見汝仲氏之死也抑猶未以爲深悲而甚憾也而汝於侯膠漆日堅侯解而西若欲汝攜而母而兄皆聽汝行汝之別予意雖踟躕然豈謂其終天之訣乎汝客帝里衆傳我死想汝心驚宿疴復萌幸既相聞書來勤勤買藥求方勸我自防尋報汝疾亦已就康胡云又病遂止於此嗚呼是又因我而使汝家不得見汝之死也其能不悲之深而憾之甚乎哉雖然汝爲何人生長何方而



常侯一門內外百口附汝如其子弟哀汝如其骨肉醫藥  
棺斂毫髮無悔而吾常侯親爲奔走浙江之上具舟徒  
以濟汝使汝伯氏迎汝之柩不勞寸力輕行善達以返  
而家是孰使之然歟莫之爲而爲者非天歟莫之致而  
致者非命歟然則汝雖欲勿死於異鄉其可得耶雖然  
汝母老矣去年哭一子今年又哭一子雖曰非我累之  
實亦由我致之吾猶自悲且自憾而況於汝家也汝喪  
及門吾既哭汝吾暫適鄞汝葬未決脫或後期不克臨

穴用先一奠極寫予哀嗟汝已矣無復望矣然予之文固不足傳於世其萬而有一傳則汝之名猶可托予以不腐於汝足矣嗚呼汝靈其克知之哀哉痛哉

祭外姑文

自某爲夫人子壻館於堂廡者一年月一再見或累見者二三年其他往來無常期又十有一年視夫人言色如一日未嘗斯須憂且愠也不獨遇子壻然爾視夫人於其子孫於其女婦於其臧獲未嘗毫髮怒且恨也夷

夷愉愉舒舒徐徐專靜以自居蓋始則相夫教其子而勤其家晚則泊然休然有姑之尊而不問其餘噫嘻此非婦人之德歟子婦孝敬門庭詩書田園固薄甘旨自如安寢良食弄孫以娛壽七十有一齒髮未枯十日之不康青山白雲歸從其夫噫嘻是其福雖未盡而亦奚不足歟日者余婦歸寧夫人撫之曰汝幸而得良匹吾雖老不以汝爲念也瞭然斯言余敢忘諸僻在下邑窶且多事使余婦緩於葬喪而今始實來一奠不腆尚其

歆之

縣學告立周程三先生祠文

道隆千載濂溪挈之河南一門式昭晰之格言洋洋德容臨臨新我邦人尚始斯今

告立張呂二先生祠文

邦君南軒博士東萊使是一州見聞迪開餘澤之垂祀事孔宜懿哉淵源勿替承之

到任謁廟文

季氏陪臣旅泰山僭也縣令小侯事方嶽可也幸無大

害於禮是用從衆齋祓祇見其敢徼福

原註  
嶽祠

古禮祠后土氏封境之神也後世加祠城隍都邑之神

也今俗又祠土地室宅之神也義有可通則禮不爲瀆

涖事之初敢不祇見

原註  
縣衙土地

獄祠臯陶自漢已然明刑弼教之意不傳而受賕舞法

之徒常瀆祀不已以求福可爲悼歎某雖無淑問敢不

敬戒自勉

原註  
臯陶祠

海陵縣到任謁廟文

惟神以聰明正直爲德佐天地佑善罰惡無或差施有如某而敢負名義毀廉恥獲戾於父母以爲此邦民吏羞者神實臨之矢心以言尚克自敬無怠

原註  
城隍

常熟縣到任謁廟文

竊迹此邦實惟聖門高第言游之故里古今遼邈風化方傳某受縣之始祇見學宮心不敢忘懼力不足聖賢

監臨尚佑啓之

原註  
縣學

惟今守令亦古諸侯率民事神莫先社稷某來祗厥官  
首謁壇壝惟國之故非敢驚俗其自今雨暘時若土穀  
成功則民之福也神之賜也

原註  
社稷

名山大川祭不越境古也東方諸侯會盟泰山通祀於  
國自是始矣世降益舛禮黷不經某力未能正也亦惟  
以心事神爲民祈福而已

原註  
嶽廟

吏食於國神食於民吏職於明神職於陰負國禍民其  
責惟均某方將早夜自勵亦維明神相之

原註  
諸廟

去任辭廟文

爲令茲邑職當興學以善其俗德薄誠淺觀聽未孚又  
不及待其久而奉檄徑去再拜庭下負罪實深

原註  
縣學

不肖無以丕揚先哲之訓興起後學祠像雖嚴大懼虛

設奉檄辭去媿負何言

原註五  
先生祠

獲率吏民以事邑之社稷逾年於茲歲豐人安雨暘時  
若允有嘉貺今被命入蜀用謁辭於壇下惟神方大相  
國家均福四海某未能忘仕將隨所往而致明事之心



焉原註  
社稷

去任辭廟文

學者於吾聖人昭昭然心目之間如適四海無往而不見天地日月安有一日可違而去也州縣吏始至者謁於學比去則辭特其禮然爾某學未能適道而三年於斯猶得免於大戾以未玷於名教是惟父兄師友之賜六經仁義之餘澤實溉潤之脩德講學徙義改過繼今以往敢不益自祇懼以事斯語照臨在上庶有以堅此

心也

原註  
縣學

欽定四庫全書

燭湖集卷十四

宋 孫應時 撰

四言詩

唐侯仲友之守台爲浮梁於江象山今蔣鶚考  
叔賦江有濟三章以獻余時官於台見而陋之  
作江有梁

江有梁美台侯也州之南阻江比舟爲梁自  
唐侯始也

江有梁昔所無兮台之民維艱虞兮我南之耕其出于  
于我北之趨維薪維芻匪伊薪芻行旅載途風雨晦冥  
海波愁予豈無舟人徼利以呼偈仄淪胥云誰之辜

江有梁維今始兮台之民維天啓兮邦有父母視民如  
子民號於溺侯曰由已乃相乃謀乃築乃峙其桴聯聯  
其舟齒齒民不知江有道如砥我醉我犇云胡不喜

江有梁孰使然兮台之民曰侯賢兮孰使侯賢有命自  
天天子聖仁侯乃來宣自我侯來有麥有年天姥之南

東溟之壖濤瀾不驚歌舞後先汝不我信視此一川  
我梁旣成我民旣平侯智不矜侯心載寧帝曰汝歸其  
車宵征予欲濟川邦國是經民留我侯敢與帝爭我帝  
我侯眉壽無疆

江有梁四章三章章十六句一章章十二句

五言古詩

四明山記遊八十韻

平生抱遐尚撫劍遠行遊迹謝聲利牽心與巖壑謀東

征泛滄海南鷺踰丹丘西登岷峨嘯北望關隴愁匡廬  
挽歸轡巫峽紆行舟劍閣最險壯龍門更奇幽歷覽雖  
未飽勝槩略以收爾來卧燭湖清夢長夷猶家山維四  
明名字橫九州出門宛在眼欲往輒不酬人事真好乖  
山靈豈吾仇忽近益可笑投老空自尤茲辰正芳春會  
心得良儔羸糧幸易足決策遂所求中宵雨聲斷逗曉  
霽色浮天容極瑩淨風氣正和柔瘦筇挾籃輿野服兼  
輕裘遙遙指林麓欣欣聽溪流試履清賢嶺弭蓋白水

湫飛湍響淙潺怪松韻蕭颼艱然小羊

原註  
顧嶺名

喘若料虎

頭甕石訪歲期負樵歌道周百折快一眺千里森雙眸  
峰巒何綿聯脉絡相纏繆化鈞妙融結神工巧雕鏤長  
風動溟渤洪濤簸瀛洲巨鰲出巔巔游龍繞蛟蜆鯨鵬  
恣摩盪蟲魚紛疊稠萬怪各起伏千帆遞行留或坦若  
几席或戕若冠旒或排若劒戟或剡若戈矛或舞若鸞  
鳳或驟若驂騑或若戲狻猊或若鬪貔貅儼然開明堂  
玉帛朝諸侯赫然會岐陽長園方大蒐麋戰臨長平堅

壁持鴻溝廣野列車騎中軍嚴旆旂開闢洪茫茫變化  
久悠悠愕眙不得語形容那可侔仙樹四十圍蟠根幾  
千秋老幹枯不死新榮翠相樛飈馭定來止桑田行驗  
不遺跡信所聞輕舉當何由東南徑崇岡左右羅平疇  
人家散鷄犬村塢來羊牛官征畢薪炭春事動耜耨土  
膩少沙石氣寒無麥莖荒蹊夾桃李密蔭間梧楸是中  
可避世何勞更乘桴駢巖下蒼峭別岫爭崢嶸孰知二  
剎勝逝肯中道休杖錫既巉絕雪竇仍阻脩停雲朝漠



漠剛風畫颺颺盤磴度方橋廣宇連飛樓珠璣錯藻繡  
金碧照彫髹撞鐘食千指鳴板燈百篝真成天上居不  
涉人間憂周遭富佳致徜徉得窮搜妙峰遠色湊錦鏡  
波光瀏兩溪來活活千丈落瀟瀟深瀑標隨鳬空潭隱  
靈虬倒窺凜欲眩俯掬清敢漱澗草高下積巖花零亂  
抽掛壁見獮提食苓聞鹿呦日長轉睨睨霧暗啼鈞軒  
修竹奏琴瑟細溜鏘琳瑯占晴喜哢鵲畏雨愁呼鳩何  
妨共齋鉢且復薦茶甌老僧頗好事幅畫肯見投隨意

宿山房無眠聽更籌念昔身萬里及此天一陬登臨世  
界闊俛仰歲月遒榮辱兩蝸角聚散一海漚塵鞅自束  
縛名場相敵讎不念猿鶴怨坐令泉石羞心期晚乃愜  
俗駕我尚優勝具學支許竒蹤非阮劉時哉山梁雉樂  
矣濠上儵聊追興公賦不歎柳子囚招招知音子爲我  
商聲謳

送張敬夫棧以追送不作遠為韻賦詩五章藉  
手言別不勝惓惓愛助之誠情見乎辭惟高明

幸教

平生賦褰裳親意許從師四海非不廣獨仰大雅姿  
逡巡一再見慘憺已復辭霜風送旌節遠目不可追  
挾經問疑義倘許結後期

斯文肯空言經世資實用紛紛諒奚爲義取輒賓送  
誠能正其本談笑了羣動公身紹前烈時論倚隆棟  
持茲竟安歸引類相與共

軒冕付儻來良貴應自有若人出處間與世揭山斗  
雅

宜踐高門斷國極可不臨風耿予思霧雨深稂莠凜然  
嚴冬栢特立終耐久

荊州形勝地控引吁廣莫英雄昔用武跬步圖宛洛至  
仁先內治豈曾廢遠畧公來手摩撫士氣端可作載歌  
江漢詩奮袂空爵躍

力行希孟韓波蕩斥稂阮聖門有佳處誰爲發關鍵歸  
依得其人心豈間近遠悄悄客路長肅肅歲華晚祝公  
黃髮期永好情繼繼

送友人楊仲能東下以一蹴自造青雲分韻得  
一字

君王急搜羅九土規混一蜀山甚踈遠去者今稍密夫  
君偉才具文字尤炳蔚陸沉簿領中塵霧昏玉質正應  
著臺省邂逅破回遒輕舟下三峽春浪平如席攬觀山  
川竒感嘆日月疾便好作諫書曾憤吐堙鬱薰風御爐  
香天陸踏文石此時恨見晚端不負疇昔或求西南州  
爲國撫貧瘠因以壽老親繡幃圍畫戟日邊豈無心遲

子付異日離樽聊共持  
愁思黯難釋勇去仍趣歸  
修途  
護眠食

讀晦翁遺文悽愴有作

先生千載人浩氣隘穹壤  
早薄聲利交超然傲塵鞅  
飲酒讀離騷追游必豪爽  
風月飽高吟雲泉擅奇賞  
切骨痛國讐嚼齒憤奸黨  
縱談天下事一一如指掌  
歛意師聖賢精心玩圖象  
全體極渾涵靈根妙充養  
昭昭陳軌轍坦坦闢榛莽  
陶鎔就醇粹鞭策收勉強  
瞿聃息遁辭

關雒大遺響師道屹尊嚴人材興凋儻宸綸歎廉靖朝  
蹟基忠謹康廬委符竹越絕畀英蕩芻牧活饑惇天日  
快幽枉命義信行藏風標何翫麟晚來侍細旃時益異  
疇曩孤蹤反山林百怪幻夔魍先生一澹然幾微寧快  
快冬曦暖袍屨秋風颯几杖尚可淑後來何言遂長往  
睽離思遠道殷勤媿殊獎常懷訂羣疑忍獨拜遺像感  
舊日蕭瑟出門增愴怳一致無古今萬世均俯仰微言  
在遺墨沒齒抱遐想末路誠刺促中局故弘敞惟善不

可誣惟惡不可長百年非所知常如侍函丈題詩自激  
昂山川悲莽蒼

七月一日獨遊頂山上方院

澗水有奇觀山蟬發清歌穹林翠光合深谷涼風多孤  
遊正寂歷佇立久婆娑平生頗須此欲去意如何

立夏日汎舟遊青山憇楊氏庵示諸生

歲序忽云夏青春去安歸天清風氣朗游子懷芳菲碧  
湖泛我舟輕雲湛晴暉入谷山寂寂綠溪水圓圍翛然



得幽憇丹葩耀巖扉鳥聲自歌呼竹色相因依舉觴佇  
遙念日月如梭飛平生靜中願歲晚無相違

和魏公再用韻勉子孫學

儒家乃何事駕言聖門歸萬古江河流三春卉木菲忍  
將少年意負此白日暉拱把得封植要看四十圍東山  
公別墅明湖照簷扉塵囂澹一洗六籍真可依城南拜  
新作妙墨龍蛇飛著鞭繼家聲臨歧莫依違

和陳亮功張次夔二同年唱酬廉字誠字之作

早韭到晚松紫蓼仍綠葵古來志節士此味良自知銀  
鞍黃金絡綺戶芙蓉閨丈夫各自適物理那能齊

虛中答遠響不與律呂乖惟誠貫萬物此豈欺我哉九  
仞憂棄井累土期層臺汝州春風中試坐一月來

用前韻感事

駒去不食藿馬佚能傷葵烈士多慷慨耿耿誰當知起  
吟清夜闌邊月明春閨寸心杜陵老湏洞終南齊

竿門抱瑤瑟雅與時好乖閉門守長饑毅然丈夫哉南

楚臥龍士北燕黃金臺但使本根在功名真儻來

李允蹈以詩見詒走筆和之李號能詩諸貴人  
客也

四海夥人物百年各馳驅持身付埃塵擾擾竟何須臨  
邛家四壁洛北飯一盂白首頗光榮不媿初心無男兒  
胷中竒玉虹自呵噓滄浪振幽潔沆瀣餐雲腴養性一  
無累經世乃其餘芙蓉爲裳衣秋蘭爲珮琚西遊畧崑  
崙東征拂玄菟乘風秣天門九關請三呼太息治安策

中流資一壺河山洗袞氛日月行天衢凌煙千載容丹  
青爲君鋪請君辦此事勿待餘子俱我懶復無用藜羹  
守故書敢云驪龍睡妄意淵中珠

李允蹈再詩言別次韻

仙人騎長鯨醉與月相追落筆千萬篇要與風雅期里  
耳習已唱未省白雪詞欲當莫邪鋒斷毛真一吹文章  
游戲耳功名須鼎彝推轂天下士豈無鄭當時我愚敢  
望君君胡首肯之酒酣激清嘯八極隘指麾丈夫嘆歲

晚不恨一別離行行愛體素江湖勞夢思

吳文伯用李允蹈追字韻見贈亦次答之

鷄鳴市聲起冠蓋日相追終然寡同調千里懷風期憶  
從十年前識君黃絹詞安知淮海來得此墳簾吹武庫  
森器寶清廟陳尊彝持君胷中富自足夸一時况今亨  
衢開秣馬隨所之功名何足道談笑觀指麾交情無遠  
近人事有合離他年一尊酒長恐勞相思

和答司馬宜春朔

紛紛市道交勢利爭攫取煌煌鼎食家聲色自纏糾畸  
人固寂寞蓬蒿侵甕牖有時步虛曲植杖話農畝清秋  
動幽興有月欠肴酒高軒肯相過賢哉百乘友空尋奕  
秋誨不與歡伯偶別來雁欲賓晴喜鳩還婦村酤聊可  
載草具亦何有飮餽止魚蝦扶擎雜梨藕君侯反觴客  
欲起輒被肘意重黃金百氣豁雲夢九長篇繼踵來子  
建才八斗勉和若登山吾詩真培塿

答潘文叔見寄予十月嘗訪文叔文叔許來而

猶未也

別離一何久迢遞阻音形重上君子堂相見眼終青君  
顏尚冰玉我鬢已星星借問十載間風波兩蓬萍嶺劒  
各萬里心目多所經歸來且強健恍然真夢醒可憐萬  
修竹清音玉瓏玲蕭條媚寒日約畧環翠屏相攜復一  
笑芝蘭有餘馨孤雲自舒卷野鶴來青冥平生閱羣彥  
十八九彫零吾徒亦何願畢景依林垌種秫令可釀儲  
粟常滿鉗琴書奉娛玩足以陶性靈千載伐木篇此意

神所聽往來亦奚憚江浦堪揚舠

毘陵龔君以室見投古風思致不凡依韻答之  
驅車適古道道古世已今翳翳逃空虛幸有楚然音歡  
言指萬里握手再沈吟得無霜露繁恐復江漢深我聞  
道渴者朶頤望梅林至味難誑口達士多遠心天淵本  
曠蕩鳶魚各飛沈相期崑崙顛弄月鳴瑤琴

松柏有佳色矯矯澗谷涯要經鸞鳳棲豈怨人迹遐匠  
石初未逢千歲甘枯槎萬牛送明堂亦不以自誇奇物



固落落念此母嘆嗟君看蒿蓬茂正足供鳴蛙深根忍  
霜雪生意日已嘉終然拔青雲勿慮歲月賒

趙唐卿邀游西湖即席賦十二韻

春風客皇州積雨不得晴倚樓望西湖想見煙水平芳  
時諒難負勝侶欣來并杖藜一蕭散喚船弄空明浮雲  
爲我開好鳥爲我鳴青山次第出桃李正鮮榮華屋何  
煌煌縹緲連重城都人競時節酒舫各斜橫而我得舒  
眺緬然起深情風景自千古擾擾何所營大鈞實愛物

無使可憐生堯民保同樂吾其獲歸耕

游靈巖觀瀑布

一雨天氣清暑事亮未酷煩囂念蕭散茲晨正休沐  
籃輿試經行勝槩入遐矚紆餘緣清溪窈窕得幽谷  
一巖四壁淨千仞落飛瀑雷霆鞭墊戶風雨撼林麓  
光寒白虹下勢劇天河覆繽紛曜冰雪激射碎珠玉  
危亭著佳處盡日看不足瀕洞開心胃眩晃新耳目  
龍臍更奇事滴滴掛崖腹人言七年旱不減此一掬  
天壤富瓌怪名

字有顯伏冉溪逢子厚釀泉須永叔摩挲蒼苔碑徙倚  
古寺竹微吟忽忘歸俗駕不可宿

鄭倅是歲七月同游和余韻復和酬之

高人遺世紛山水好常酷監州當暑來風露勞櫛沐千  
里生清涼萬象入睽矚公餘事幽討駕言訪空谷豈知  
叢爾縣有此壯哉瀑飛蓋繚崇阿響屐穿翠麓林聲疑  
雨鳴石怪若釜覆輝輝倚天劒凜凜寒水玉畫圖見所  
稀瑤琴寫難足餘霏濕巾袂瑩色照眉目平生此會心

一笑欲捧腹酒間出新篇明珠粲盈掬留作巖壑光長  
令鬼神伏東山懷太傅濂溪想茂叔逸興渺乾坤真賞  
謝絲竹何由頻執鞭雲峯恣遊宿

孫生康祖從予海陵予薦之滁守趙叔明之門  
送以古詩

洙泗諸公游參實少且魯誰知一貫學其進乃甚武儒  
生多山野此事亦已古儼儼細兒黠徃徃車上舞後生  
識取舍百不能四五子兮何爲者獨行事踽踽嗟我離

師友歲月漸莽鹵子辱從之游未必免聾聵淮丞少官  
事吏散日亭午藜羹共脫粟本不計客主親年當喜懼  
藥裹屬覩縷勞子辭我去天寒無乃苦滁陽賢太守豈  
弟民父母青山照城郭廣廈庇風雨子往事佔畢可但  
費樽俎窻明斐几淨堅坐勿闕戶交情貴膽肝師道在  
規矩何妨坐椎鈍未可習媚嫵萬里須堅車百步要彊  
弩書來說新功吾其俟飛羽

和劉過夏蟲五詠

蛛

么蟲夜飛飛遭汝巧見縛汝網非堅牢豈無風雨惡蟹  
怒橫戈矛蜃喜吐樓閣物生黠復癡悟此一笑樂

螢

太陽不敢近宵行聊自娛過水亂繁星隨風散平蕪車  
公晚差樂几案不汝須方謀買婢娉解貯明月珠

蚓

高人百尺樓萬里對天宇白水渺江湖清明到窻戶跣

趺作禪定不聞雷破柱從渠蚯蚓歌自趨商羊舞

蚊

利觜死一飽何勞更喧譁肉薄來如雲舉扇誰能遮諸君幸小忍秋風期不賒披襟約涼夜明月釣寒沙

蛙

將軍鼓吹來處士非所喜誇汝風月夕天籟鳴不已汝姑勿自誇坎井不可恃當知馬伏波笑殺公孫子

用范叔剛韻送陳亮功同年

人物相後先  
筦庫故多士  
若人海邦來  
清渭照涇水  
風塵不自憚  
遠業正在此  
林深蘭茝芳  
波動金石止  
三年亦何事  
一笑聊復爾  
天風今扶搖  
勢作九萬里  
未令游蓬山  
亦合佐槐市  
富貴善移人  
須公直如矢  
平生十年書  
喜見習鑿齒  
少留更春容  
春醪薦魴鯉

如寧庵

川原相縈紆  
林谷遞深秀  
步迎流水聲  
聒聒新雨後  
愴然瞻故丘  
喬木百年舊  
精廬跨略約  
苔竹故幽茂  
憶昔



戲綠陰怡悅年方幼蹉跎今白髮寒暑厭相寇區區濟  
物心已矣真大謬請尋遂初賦泉石長枕漱

小舟過吳江風雨大作夜泊三家村翌日風回  
到家日未中

短篷僅容坐一滴不通雨不料西南風滂沛遽如許蕩  
搖首屢觸跼彎背欲僂行經四橋側心動不敢語茫洋  
萬頃天一葉縱掀舞翻思田舍樂甚念篙人苦黃昏隨  
意泊古木蔭靈宇小作鷄酒願欲禱辭未吐覺來風回

東快便誰所與平明八十里到家日未午萬事一翻覆  
戚欣何處所舟定稍按摩起身試步武一室有餘寬洗  
杓命兒女門外風濤急閉門良可禦

庭下小檜

蒼蒼歲寒姿凜凜凌雲幹何爲事蟠處充君眼中玩翔  
鸞與偃蓋不如溝中斷高岡有同根天風拂河漢

石應之校書招同胡崇禮趙幾道飲白蓮社晚  
雨

白蓮遠公社不能致淵明雷峯峯下庵乃復浪此名野  
客當暑來喜甚荷風生柳渚睇窈窕竹房步紆縈西軒  
正虛寂一鏡湖光平小飲試談噓高吟發幽清兩士幕  
府彥主人芸閣英我雖漫浪者頗復同勝情六合自今  
古百年各經營悠然一笑聚急雨催詩成

送彭子復臨海令滿秩

君侯古循吏及物如春醲民間自寧一堂上何從容平  
生眼中人此尹未易逢吏道益可悲非君吾孰從

由求政事科量已如尺寸後生談天下可笑不知分吾  
曹師古心日夜抱孤恨脫身朱墨中未妨尋學問

相逢幾何時相與何如許書來警吾過切切父兄語人  
生會合難念別成悽楚北望山千里秋容渺煙渚

秋風滿庭樹策策鳴良宵幽人獨晤歎時序何蕭條寒  
華豈不容念之中心焦我巢在一枝風雨無漂搖

送王木叔推官滿秩

聽雨宿空山念當與君別起行意無柰雨聲轉幽咽名

賢去蓮幕一郡慘不悅人心到無言冰寒炭故熱  
世道不平易心如太行山交遊水上萍相知甚獨難感  
君一見初信我眉睫間松栢氣本同蒼蒼期歲寒  
靈臺湛虛明萬物懸一鏡飢餐夜熟寢是我真實性牛  
山多斤斧草木非正命君乎善自養吾心本無病

送台州沈虞卿使君入朝

鼓聲霜曉寒冠蓋滿衢路詔書日邊到使君朝天去攀  
車願公留稚耄紛無數信哉慈父母赤子中心慕七州

浙江東此邦亦蕃庶使君手拊摩白髮緣汝故明時急  
良猷此行那能駐眷眷公豈忘江城一回顧

靖康建炎事嘗聞諸公言志士日夕心嗚咽聲氣吞新  
亭五十年塵埃尚中原君王大經畧夢想天河翻時情  
習安宴未辦酬國恩修攘亦有序此事難遽論所要夙  
昔懷勿以暮氣昏爲公一悲歌風雲澹乾坤

東南數十州今惟本根地因仍軍國須支吾亦良費簿  
書高沒人大率非古意先生海邦來歷歷眼中事誠心

對天日正色俯民吏那無一夜驚感歎不能寐九重憂  
民深時節苦未易源流儻可言請拜仁人賜

不寐

索居在村坳水陸走通津半夜有棹歌鷄鳴語行人中  
年近少睡耿耿多達晨外物非所念頗復念我身聖賢  
不敢欺久大在日新人生會有役安得辭苦辛

別黃巖范令

慶厯諸名卿四海標一范堂堂元祐相人望復不減江

河源流大終華峰巒嶄遠優士會燮詐作藥書鷹君侯  
大雅士淵然粹家範春風花氣馥秋月寒江湛貞剛謝  
瑕缺潔白消黥黥驅車問前躅雲路聲轡轡牛刀亦何  
爲游刃初不斬解令襦袴民析楊戒無犯時情互醒醉  
世味各辛齟安知國中狂正欠秋牙喊丈夫自有在細  
故非所歟豈無昆明池著此黃龍艦伊余秉微尚顧瞻  
隨軌軌威儀覲麒麟冠綏笑蟬蛩吾徒本平曠誰能事  
嶮巖相知意氣得欲別精神黯江風動綺席潮痕帶晴



檻爲公醉登舟離襟不能摻

和制帥效謝康樂體

讀書在雪屋長嘯亦蝸廬  
茲晨從遠役不柰爲饑驅  
夕棹悄煙月朝帆暖菰蒲  
情欣秋風至體愜裨暑徂  
拾魚未收潦爭米聊趨虛  
廓落展遐眺春容進前途  
暮晝諒何取世用實已迂  
分閭重節制三邊藉調娛  
功成報天子朝珮歸與與  
下客一何幸窮途非所虞  
江山待公賞佳處小踟躕

臨海道中書懷

六月呼清風涼氣隔纖紆元冬映窓隙重繭不能御天  
時迭乘除人事多齟齬愴焉感余懷百年幾寒暑  
儒生不知變區區誦陳言時人熟見之嬉笑相排根江  
流去不返何時復虞軒餽羊誠無用禮意儻可存

章安鎮感事

越嶠東南窮連山赴滄海章安古州宅陵谷諒遷改前  
江渺萬頃風雨魚龍匯嗟哉地遠絕髣髴形勢在憶昨

南渡初雲雷震紛靄莎州艤龍艦白日照金鎧兒童識  
漢官草木被堯彩是時元勲誰成公國上宰人心翼宗  
社天命安鼎鬲那知中原事驚呼五十載丹衷自結髮  
彈劍氣蟲窺時清忘夙昔悲歌起哀急舉頭天門高狂  
言小臣罪功名故難量時節亦有待臨流想前英奕奕  
動風采漁郎定何心波間聲歛乃

頂山禱雨

官身縛塵事日日如絲棼駕言適秋郊開顏慰艱勤大

田平如席多稼綠於雲早熟有餉獲晚播方耦耘停鞭  
問父老笑語何欣欣今年大好麥稻復當十分天應憐  
百姓似亦憐令君我本無善政謗罵常紛紜獨慚龍公  
賜一念如相聞尚憂北山外漸有龜坼文爲爾乞終惠  
潔齊炷爐薰何當足吾願豐年周九垓

端午侍母氏飲有懷二兄偶閱二蘇是日高安  
唱和慨然用韻

簿書束縛人揮汗日亭午平生世念薄問子何自苦佳

辰相尋過樂事稀可數撥置爲親壽  
菖花粿盤黍歡言  
記時節風俗自荆楚獨嗟我常棣不得同  
笑語楊梅應  
正熟筍筍堪自煮對床負歸約枕流慚乃祖  
會當誓丘  
墓畏出如畏虎莫作兩蘓公空言終齟齬

五月二十日還舊居有感

晨光澹涼月霽宇來清風輕舟泛漣漪  
初旭升曈曨水  
氣散洲渚蔓花綴榛叢我行何所之故林翳蒿蓬捨棹  
理幽徑開顏揖前峯出門望平臯良苗鬱以蔥  
恭惟昔

先人有此一畝宮遺字滿塵壁所憂非困窮但願君與  
相愛調致年豐諒哉烈士心舉世故莫同踟躕不忍去  
惻愴結微衷

夜讀書有感

王公昔壯年已作衰翁歎

原註荆公詩年登三十已衰翁

古來多志士

念此不能旦嗟余何爲者忽忽甘寢飯故書翻手忘神  
情日踈散前途雖綿邈初心如可辦云何十年外低徊  
猶有憚蟋蟀鳴我堦秋風歲將宴日月豈待人及今當

自諫

和甲辰秋夜讀書有感韵

物華相尋來世事不足歎  
候蟲知春秋宿鳥各昏旦  
百年相勞苦且復加餐飯  
堂堂白日在擾擾浮雲散  
詩書信家法朱墨窘官辦  
三十二年非還改當何憚  
低徊逢迎地言笑紛晏晏  
嗟汝其惕然興衡有規諫

黃州呈趙使君

魯狂不媚世世亦與我違  
平生懷識察如公良獨稀  
塵

沙二十年孤舟萬里歸見公不忍去安得長相依  
歐蘇遊息地草木有輝光使君何風流入手兩印章下  
客亦天幸音塵許相望不登醉翁亭尚能登雪堂  
雪堂老居士赤壁故將軍蘭舟醉烟月羽扇麾風雲登  
臨生感慨江空水沄沄從公一長嘯神游儻相聞

小孤山曉望

維舟小孤下終夜風水聲雞唱起推戶耿耿殘月明四  
望無纖雲景氣穆以清碧山吐紅日綠樹啼鶯鷓鴣茲峯



何娟妙臨流竦春榮再拜歎靈宮緬然念平生一役已  
萬里百年定何成隔江見彭澤懷古有餘情

到荊州春物正佳樞使王公招宴歡甚已而暮  
府諸公攜餞荊江亭併成四詩

初日明遠岸綠蕪滿平川天宇呈春姿物物懷芳妍長  
隄行車馬高樓餘管絃由來大國楚風景故依然

華亭冠層城滿城桃與李微風散晴煙七澤多春水龍  
山集遐眄章臺見遺址感物思無窮對酒差可喜

簪弁從元侯芳辰奉良宴海棠映明燭夜久星河轉孤  
舟萬里客邂逅驚深眷慚無仲宣賦荊州乃堪戀  
幙府盡時彥湛輩非所倫歡言念游子載酒臨江津醉  
別足可惜俛仰迹易陳相期崇明德芳烈垂千春

答王甫撫幹和荊江亭韻

劍鬱氣衝斗珠潛光媚川丈夫自有在時俗難爲妍鍾  
期苟未逢我琴不須絃別路渺湖海相思心炯然

清詩報我來瓊玖羞木李感我萬古心迢迢如江水楚

宮歌舞地春農耕廢址變化日相尋榮華何用喜

樂哉新相知開懷接談讌插花醉不辭風光惜流轉酒  
闌欲上馬握手增眷眷平生我輩人定非兒女戀

別時記撫掌醉劇語無倫君如齊轅固獨不類平津交  
遊半白頭心跡誰爲陳由來松栢榦不爭桃李春

澗壁梁公主祠云武帝女也據高塚上林木鬱鬱

然形勢開敞盖公主所葬歟無碑志未及攷諸  
記載士大夫留詩未見有起人意者余守風四

日為十二韻

蕭翁本勝士諸郎多藝文傷哉晚大謬家國成絲棼主  
昔食何邑桃李爭穠芬禁臠必王謝風流映青雲豈其  
獨天幸不見臺城軍曲阿故近甸茂林有高墳玉魚既  
無恙廟食仍蒿焄此事乃可書所恨荒前聞千舟集浦  
溆吉卜叩靈氛我亦肅襟履一辦崇鑪薰徘徊慨千載  
江波日汙汙誰當著奇語歌之擬湘君

欽定四庫全書

集部

燭湖集卷十五

詳校官庶吉士

臣吳烜

主事

臣

呂雲棟覆勘

謄錄監生

臣

南光祚

欽定四庫全書

燭湖集卷十五

宋 孫應時 撰

五言古詩

澗壁阻風登小山四望書懷

崇阿岸長江荒蹊得徐步徘徊一舒眺邂逅豁心素天  
壤故宏廓川涂渺回互蒼烟極東溟落日臨北固波光  
蕩汀渚碧色明草樹淮南平如砥萬象入指顧低迷江  
都宮隱鱗瓜洲成依依眷昔游惻惻起遐慕向來猶喜

事所歷有奇趣推頽八九年日已不如故兩脚厭行李  
萬里諳長路廼窮岷山源重到入海處結交豈不廣覽  
古亦云富所抱憂國心知非濟時具晨昏耿重闌裴葛  
窘童孺脫然決東耕孤舟久東驚寢近真自喜凌險有  
餘懼可憐茲叢薄政爾淹杖屨雲容尚飛揚風意何鬱  
怒人事諒難必江神非所忤庶蒙皇天慈穩借一帆度  
致意孫興公尋君遂初賦

子寶東歸以嚶其鳴矣求友聲為韻作古詩七

章寬予旅懷次其韻

一年三送君到家能幾程白雲耿我懷更想啼孩嬰過  
門道無恙憂端幸少平因之慰猿鶴無為長怨聲

宇宙歸一槩時勢相重輕人心太行山我道如砥平沈  
吟百年事俛仰萬古情五窮未可送鬼語方嚶嚶

傾城事行樂春臺日照熙掩關獨愁思誰能赴幽期故  
山隔湖海浮雲翳晴曦由來武安客豈復知魏其

哲人重出處外物非所榮鳳饑不啄粟鴻冥安可矰早



知屠羊肆無所用三牲儻來亦儻去不平何足鳴  
歲寒松栢蒼波動金石止物生不自別有時正須此真  
源在極致空談非實理玉汝其或成造物恩大矣

弱齡抱微尚實耻為身謀頗依夷惠間不擇趙魏優意  
行忘坎穽失脚復何尤但存斗升養過此今無求  
教不貴多言小知非大受力久有天得海涵而地負少  
年今白髮誰與鞭其後詩來讀百過君真吾畏友

秋日程伯玉携詩見過次韻

秋聲入梧桐落葉驚甕牖菊叢生細香安排作重九幽  
子曳杖吟蓬門獨搔首故人惠然來新詩出瓊玖歡言  
掃吾室餽飮隨所有高談雜古今疑義相可否當年醉  
翁意固不在杯酒人生等一夢諒無金石壽從渠秦鍾  
鼎未可薄藜糗斯須較榮枯千載判妍醜君侯文章家  
世胄衣冠後何傷回憲貧正是裘牧友俗子揶揄人古  
道陵遲久無勞問董龍定是何雞狗

和劉師文飲城西見懷

劉侯元祐家高標振流俗益州西門外勝日事幽矚襟  
期得佳士命駕不待促壺觴傍水石談笑滿林屋經行  
舊臺苑蕪沒長禾菽長吟何激烈遠思脫羈束遙追七  
賢社不負千鍾祿詩囊寄同幕足音到空谷明月散昏  
埃清風濯炎溽壯游憶子美感遇悲伯玉功名垂耳驥  
歲月長飢鵠此事置勿言時情鬪蠻觸

重答

萬古同山川八方異風俗男兒事弧矢心目快一矚結

交必名勝曠懷無狹促昂昂千丈松朗朗百間屋彼富  
自鍾鼎我貧甘芋菽誰能工俯仰未許相縛束讀書頭  
欲白對客樽無淥由來多此士皎皎駒在谷瞿唐候水  
齊秋風祛暑溽歸歟奉親懽羹絲鱸江玉青衫雖霜葉  
已勝袍立鵠進退吾何疑肯事羝羊觸

入劔門和少陵韻

客還入劔門縱覽形勢壯兩崖摩青天石城岌相向風  
雲鬱慘澹神鬼見情狀重關一何危哀壑不可傍巖蹲

虎豹怒水落龍蛇放英雄意飛揚行路色沮喪殺人古  
如麻俛仰有餘愴我遊亦何事哦詩神頗王杜陵千年  
句角逐不得讓過關一雨涼濃綠出千嶂獨酌無與歌  
懷人復怊悵

石櫃閣和少陵韵

榴花開正紅杏子熟已赤谿舂倚天嶂成削出水石小  
驛有幽意江風滿青壁悠然一杯酒勞汝萬里客長安  
此北去古人多遺跡蕭條干戈後俛仰關塞迫宿師苦

餽餉諸將飽恩澤三歎復出門危梯欲何適

讀士元傳

老賊狐鬼嘯漢鼎不復支再世益州牧忍視宗國危烈  
烈左將軍四海聞英姿東北久蕩析西南天啟之建旗  
入涪城有蜀非公誰檄璋送州印我欲舉義師鼠輩坐  
斂手豪傑趨指麾正爾豈不濟安用譎取為孝直反覆  
士獻計乃所宜雛鳳獨何心亦復喜出奇造次盃酒間  
而欲生嶮巇平生大耳公豈堪此瑕疵向來隆中語荆

益實素期惜不同茲役次第觀所施士元早捐世未必  
為漢悲我詩訂千古當有神明知

定軍山歎

仲達受巾幘佐治來閉營君看此情事豈辦吾孔明八  
陣有天威千里無留行但度渭水去賊勢能不爭便當  
截狼頭三輔即日平連年計茲役獨坐糧運縈所以五  
丈原駐軍方雜耕俶載維首夏望望秋穀升云何西風  
至忽已落大星痛哉萬世功於此喪垂成炎精遂淪謝

王路終榛荆三馬肆蹄齧羣雄迄縱橫公乎少徐死此  
禍何由生天機定誰執變化紛可驚喬木定軍山空有  
身後名世論復鹵莽嗚咽志士情朗詠少陵詩何誅陳  
壽評

勝果僧舍與葉養源論武侯出處作數韻記之  
隆中躬耕歸抱膝詠梁父誰稱此卧龍名字震東土平  
生惟老龐忘言各心許相從亦何為誓不入州府敲門  
劉豫州見我欲安語三來信勤懇定非曹袁侶社稷高



帝孫此公更儒苦不辭為君起死生不相負嗚呼豪傑  
士所重在於出處人言漢丞相阿衡師尚父綸巾拜遺像  
英氣凜千古當時實少年纔二十四五風雲有時會人  
物難浪與諸賢誠慷慨毋勞自夸詡

玉虛洞

駕言玉虛游竒絕慰心賞餘雪明層陰初旭上清朗寒  
溪玻瓈色遠壑風雨響刺船度石瀨散策步林莽洞門  
劃褰開瑤室下深廣分明堂九筵恰匝旗五丈壁紋妙

雕刻石骨工刻礪雲霞夾日月麾幢導龍象異哉非人  
境儼然故仙仗犬鹿訪前聞笙鶴寄真想天寶本衰運  
靈局為誰敞崢嶸昔祠殿蕭瑟今廢壤謝公詩絢麗黃  
郎筆豪爽斷碑亦可憐英標復何往把酒酌孤亭回頭  
嘆塵鞅幽討方自茲當費屐幾兩

東歸留別幕中同舍

叅謀蜀耆英棠陰滿三郡開懷接兒輩色不見喜愠清  
朝貴老成故家多典訓佳氣引春帆長安天日近

梅溪千載人我得交其子霜天行白日了不受塵滓明  
朝把一麾濶步方自此海內觀典刑豈惟吾黨喜

元祐賢子孫忠肅家第一豈惟富文雅清苦用一律君  
看我同年踐履極真實不待問蒼龜公侯卦可必

大蓬有奇氣人物見李侯迴然謝凡質霜鵲摩清秋詔  
書相續來去去躡瀛洲汲直在漢庭可寢淮南謀

陳侯七閩秀六年客西州蘭茝自芳潔應世良優游平  
生耐久朋政復未易求相期故不淺抗節追前修

我家客星里少小釣寂寞推遷墮塵網世味終然薄萬  
里攜一身俛仰歎今昨抖擻菜子衣歸歟老林壑  
相從樂復樂別離良獨難傳觴秉明燭起舞清夜闌一  
醉何足辭百年能幾歡後會渺何許相思江月寒

答季章和寄同舍韻

論交萬里外意氣薄雲天孤舟日已遠擁書夜無眠驪  
珠從何來光景明一川櫝藏懷永好欲報心茫然  
仙風自灑落古氣更清深雕几薦六瑚定無塵土侵儒

生傳舊法君子愛初心願令百世下重聽雲韶音

元日自警

原注  
庚申

王春肇嘉氣天命未敢知四十六年非今日正一之昭  
昭汝初心敬戒以自持神明監屋漏此語不可欺

自警

忿燥肝或裂懼劇胆能破吾身幸無苦及茲無迺過虛  
中閱萬物谷響聊應和可令蠹蝕月竟作蟻隨磨根危  
實易感驟嚙忽已唾何當安如山持用警昏惰

寧庵即事

颼颼松風鳴翳翳山景暮蟬聲清有餘荷香美無度幽  
人曳杖吟事勝心獨悟平生寡世念正是愜襟素坐看  
北斗移竹葉明月露夜久寂無人佳眠不知曙

道傍水行可愛

寒風鳴歲陰芸物已歸靜郊原何蕭瑟松竹自清整道  
傍足幽意林屋甚井井雞犬在籬落沙水暮光映古來  
奇逸士往往託茲境吾行將安得悵望滄水永

燈下學書偶成

學書乃一樂人或罕知趣而我欲成癖矻矻了朝暮天  
資苦凡弱師法非早悟目力又已衰恍若在煙霧雖然  
日數紙就視輒自惡旁人謬慙愚定未識佳處右軍固  
神品大令亦體具嫡傳張與顏尚未肯懷素頗怪近世  
評似為米老誤雄奇在風骨隱括須法度安得再少年  
令我進一步人高書乃高此語俗子怒

碧雲即事

唧唧秋蛩鳴耿耿秋夜長簡篇負初心枕簟怯新涼朝  
曦入疎牖宿雲散前岡歸歟一葉舟浩歌聽滄浪

七言古詩

和樓尚書賦趙大資重樓栢梁體

浙中巖壑天下雄越絕宛委吳穹窿鍾奇角秀勞神工  
復有四明冠南東雲南雲北森橫縱僊聖所宅光璵瓏  
公樓極覽面面同江霏海日開冥濛翠屏列立千萬峯  
勝畫孔雀繡芙蓉春晴百花度香風秋原下瞰禾黍芄



城郭游人紛蝶蜂笙歌間發羅綺叢我公心鏡百鍊銅  
眼底萬物歸陶鎔姬公胡留曲阜封東平驃騎合侍中  
小出勲業垂無窮手扶日轂駕六龍丹心正色羞容容  
飄然謝出明光宮坐收全名擅高蹤錦衣故里還過逢  
築室百堵聲隆隆雅素不窮丹腹功移花種竹親圃農  
直嫌看山隔崇墉層樓開豁星斗宵晨登坐達夕鼓鼙  
有書滿架酒不空眼明脚健顏頰紅身佩安危唐晉公  
何妨綠野對洛嵩文昌更似香山翁與公勝日長相從

一談一笑如春濃清歡不奏淫樂矇高山流水操遞鍾  
新篇絡繹疲奴僮寒生感公恩義重草根竊亦吟秋蟲  
扁舟登門頻宿春敢逐炎涼如燕鴻

遂安縣興學和詹本仁見贈詩

萬物野馬相追奔百年夢境更起仆是中諸妄要掃刮  
努力良心自成就舞雩春風沂水側當日羣公切磋究  
大途九軌自可識廣居安宅寧當儼少年恐不保壯老  
夜氣還能亡旦晝詩書禮樂在庠序鄉射絃歌列籩豆

共惟百聖貽後來豈使一科圖急售如何道術坐陸沉  
獨指利名紛輻輳斯文未喪天所賜接踵諸賢出哀救  
聖門榛棘得剷除俗學膏肓有砭灸晚出顓蒙格調卑  
平生師友追從舊敢言割雞慕牛刀直恐狐裘雜羔袖  
是邦山水故瀟灑滿眼衣冠多整秀向來張呂相逢地  
遺韻餘風洗凡陋眷然鄉校肯來游勉矣英材起相副  
名門政假扶持力闔境似驚聞見驟儒林丈人真好事  
大筆新詩警昏瞶寄言同社相知心不怪狂歌續貂後

答楊霖用前韻見贈

滄溟萬里無時盈太山四維不可仆蛙井跳梁徒自喜  
螳垤崔嵬欲何就物情小大乃爾懸人心是非當自究  
榮名乍滿妻孥笑權利偏供賓客餽紛紛逐臭坐窮季  
往往攫金忘正晝談誇亦或輕萬鍾蹴嘽忍能甘一豆  
人憐世網苦易縛我悲古道迂難售文章小技本遊戲  
功業有時真際輳六經墜地誰羽翼衆說滔天誰拯救  
獨行不畏迹隨削危言便恐眉遭灸舞雩鼓瑟洙泗遠

弄月吟風伊洛舊晨霞翠栢足餽糧秋蘭芳芷堪懷袖  
此身今愧五斗役歸心日繞千巖秀平生未飽書冊願  
老大自知人物陋意存當世力不能名忝儒生實難副  
楊侯楊侯豪傑士霜鶻橫空天馬驟巨堪高誼謬推挽  
喜見雄詞豁昏瞶端能有意千載前執鞭請試從公後

鄞川道中呈友人

原注  
癸卯

青山不斷煙蒼蒼梅花如雪東風香春來天地恰十日  
眼見草木生輝光清溪行舟暮鳴櫓並舡開樽共君語

人生邂逅自可憐明日江東聽江雨

斗南竹林祠歌

君不見唐河諸將兵馬回河朔百城門不開邊烽夜舉  
天子怒六龍曉發鳴春雷金陵玉壘中道惑澶淵一擲  
吁難哉當時事勢在國史萊公之功不其偉幽燕可還  
敵可臣西顧寧論夏州李用公不盡天所惜天不生公  
更誰恃嗟公雄豪從少年如虎在山龍在淵淮陰指掌  
楚歸漢望諸叱咤齊為燕兩朝五起豈不遇膠漆擺撼

難為堅癭相讒巧亦云極鶴相惡謀何卒卒青衫到骨  
吾一啗羊酒迎道爾堪恤可憐夷獠護裝橐想見神明  
扶正直公安挿竹南遷時手回造化理不疑雲車風馭  
今來否迎神送神姑爾為蕭蕭寒綠泣江雨長似襄陽  
墮淚碑

沌中即事

武昌西南雲夢澤水平不動玻璃碧葭蘆莽蒼生暮煙  
楊柳蕭條帶秋色北接滄浪南洞庭八九百里荒荒白

一渠紆縈十日行巧避江濤如過席平生聞說沌魚美  
滿籃不受百錢直我來漲潦漁者稀罾網高懸釣竿擲  
葦屋人家絕可憐欲沒未沒三四尺倚樹為巢葑作床  
剥菱炊菰自朝夕青裙皂髻長兒女城市繁華豈曾識  
屋頭一艇是生涯丁算未必逃官籍迢迢客路幾歎息  
茫茫宇宙何終極有酒無魚莫浪愁獨醉月明聽吹笛

巫山歌

平生想巫山奇絕冠三峽及茲飽雙眸無乃天下甲遠



看挿天碧叢叢近看玲瓏金玉峯  
崖光彩相映發交絡紫翠踈蒙茸  
雲華夫人瑤池女何物纔至得竒  
遇我來初日明輕霞更勝朝雲暮  
行雨水轉峯回無定姿地靈天巧  
竒復竒少陵山谷不著語浪作推  
敲君定癡

峽中歌

峽中翠壁何崢嶸排空百雉如層  
城重樓複道明丹青神剌鬼刻斧  
鑿精呀然裂入兀不崩飛流罅出  
懸珠璣旌旆夾道續逢迎霜鋒雪  
鐔立萬兵竒峰十二劍削成

真贗等好不可評

原注黃牛祠謂之假十二峯

天柱拔立千仞擎團

團石骨瑩玉冰傍有巖穴半開扃飛仙之宅凝神清蝦  
蟬下飲腹不盈背負陰壑深窈冥金碧滿洞層雲生泓  
泉泠泠琴筑鳴林端黃牛老不耕灘回白日隨人行石  
馬隻耳夢偶靈神祠簫鼓何鏗鏗江流萬古鬱不平四  
時雷霆風電聲天垂匹練相回縈日月避隱韜光明朝  
雲暮雨犬吠晴山腹人家真畫屏亦有竹閣連松亭褰  
裳可登呼可應但愁蠻語無由聽我來泝峽纔幾程所

見如許心骨驚陽臺灩澦次第經磨礪筆鋒吾敵勍

劍門行

兩崖夾道立削鐵澗水悲鳴濺飛雪上有石城連天橫  
劍戟相磨氣明滅出門下瞰山盤紆石磴斗落十丈餘  
敵來仰首不得上百萬渠能當一夫井蛙未識河山廣  
分明到此生狂想豈知天險乃誤人禍首子陽終衍祖  
渭水秦川指顧中劍門空復老英雄傳檄將軍真得意  
落星愁殺卧龍翁

三泉龍門詩

蒼山石骨高稜層繚斷谷口如堅城何年穴作甕門入  
豁然天地中開明門深十丈碧鐵色錯落鱗甲潛光晶  
溪聲瀉出駭風雨巖泉亂滴紛珠璣老藤翠木蔚回合  
幽花好鳥相逢迎異哉人世有此境顧盼蕭爽心骨驚  
想見伏龍擘山出頑洞水電轟雷霆不然避秦客仙去  
中有桃花門不扃谷深路窈望不極有泉可濯田可耕  
何當頗此一丘壑家在東吳空復情

梁山劉制參園亭

劉侯家有相業堂東都舊第城中央  
劔南參謀今白髮  
官班且復尚書郎買田築室蟠龍下  
閨門孝友師一鄉  
好園十畝當道入綠竹萬箇攬天長  
池亭面勢各有趣  
花木手種新成行客來呼酒徑留飲  
小鬟妙舞工持觴  
人生適意但如此何用塵土紛劬勦  
我來度峽五十日  
山深路惡神慘傷眼明此邦萬石壩  
况逢好事容徜徉  
野鶴寮中最清絕蠟梅水仙方弄香  
為公一醉出門去

祝公眉壽長康彊

同邱直長和歐公三游洞韻

維舟下牢關散策上西嶺天風吹我裳恍惚非人境丹  
崖翠壁明空山呀然洞府蔥蘢間珊瑚為門玉為裏石  
骨千年凝綠髓伏龍奇鬼相回環窓戶玲瓏五雲起風  
馬霓旌去不留棊牀丹竈巖之幽流水潺潺山寂寂時  
有野鶴飛迎客提攜琴酒聊一歡呼取漁樵任爭席日  
暮欲歸歸路迷襟期浩蕩誰當知好種桃花便終老更

尋何處武陵溪

送別宋金州

安康使君發成都羣公祖送車塞途秋風關山二千里  
王命不得辭崎嶇使君世族楚彭城家今會稽之上虞  
我居咫尺不早識萬里相逢天一隅眼中豪傑未易得  
使君人物當代無連年三取太守印赫然帥鉞兼兵符  
不憂無地起勲業所要許國存規撫貴人例急歌舞娛  
使君善愛千金軀國恥未雪長荷戈一念勿忘先大夫

嗚呼一念勿忘先大夫

傳惟肖贊府假西遊集作長篇送還奇其次其

韻

醉鄉不遊遊睡鄉眼花對案如迷藏夢踏秋草悲蛩螳  
風松露菊三徑荒忽然欠伸日在廊悟此身世何荒唐  
故書棄擲塵滿箱魯堂不復聞絲簧鏡中容顏老不揚  
浪求斗升助糟糠江湖蘭珮芙蓉裳踟躕不歸愁斷腸  
偉君威鳳鳴朝陽文章五色照我傍艷如屈宋班馬香



千載作者蔚相望對床泮水月滿堂追游山椒欸寶坊  
劇談發我平生狂劃如乘風上翱翔蒼蒼雲海一葦航  
周流四方來故鄉羣兒醉飽死不償我獨與君酌天漿  
紛紛爍火明寒牕何如光芒萬丈長空吟平子四愁章  
欲報英瓊無可將明朝癡兒公事忙從今謝君當括囊

永康虎頭山

去年東上虎頭灘今年西踏虎頭山定無萬里封侯相  
且復兩川行脚還眼中金馬碧雞路坐上銅梁玉壘關

丈夫萬事付前定長嘯往來天地間

夜深至寧庵見壁間端禮昆仲倡和明日次其

韻

杉松廡門森老蒼佛屋深夜幡花香借床健倒恍何處  
夢隨潛魚聽夜榔呬啞禽語曉光淨蟋蟀草鳴朝雨涼  
哦詩出門懷二妙春漲遶山湖水黃

和答陸華父

幽蘭懷春風葭蓬亦芽茁同時不同調物物自生活士

窮不自食苦學代耕獵文如六經非小伎餘事不足置  
牙齒人言擲盧勝擲雉我言函人不為矢

雖都有佳人高卧雪塞戶千載尚可期一寒那足顧功  
名誠儻來貧賤有難去食竹豈非鳳食蟲豈非雞駟虞  
世不識羔豚日剗剗且須拊掌共一笑坐上鴟夷能滑  
稽

和答潘端叔見寄

髮白念少年萬事風雨過倦游得來歸一切付懶惰獨

抱杞天憂徬徨意無奈濠魚定何樂幕燕渠敢賀歎君  
陽春詞激我巴里和古來奇特事信是英雄作東山有  
晚遇西山有終餓拭目須君早著鞭乞與高人北窓卧  
頃過周叔和見故人石應之詩及諸賢和篇大  
軸邀余繼韻久不暇遣因通五夫諸李文書畫  
然有懷走筆寄之叔和括蒼人今居五夫面山  
臨流頗幽勝予甲寅歲嘗和潘端叔一詩即此  
韻不知唱首為叔和作也

別君二十年往事飛鳥過相逢歌慷慨頗復起衰情朱  
顏各華髮此已無可奈結廬擅青山吾獨為君賀示我  
諸賢詩三歎不忍和功名付千載袖出莫輕作老去會  
有死嗟來不如餓燭湖旁舍酒可沽勝日相從同醉卧